

四庫全書

史部

欽定四庫全書

史部

續後漢書

目錄  
卷一至三

詳校官編修<sub>臣</sub>黃壽齡

編修<sub>臣</sub>裴謙覆勘

總校官庶吉士<sub>臣</sub>何思鈞

校對官中書<sub>臣</sub>王家賓

謄錄監生<sub>臣</sub>朱連傑

欽定四庫全書

史部四

續後漢書目錄

別史類

卷一

帝紀一

昭烈皇帝

卷二

帝紀二

少帝

卷三

年表一

建安以來諸侯表

卷四

年表二

章武以來吳魏表

卷五

列傳一

昭烈甘皇后

昭烈穆吳皇后

昭烈孫夫人

少帝敬哀張皇后

少帝張皇后

少帝李昭儀

甘陵王永

安平悼王理

太子璿

北地王諶

卷六

列傳二

陳登

陳志入魏

袁渙

邴原

陸績

卷七

列傳三上

諸葛亮

上

卷八

列傳三下

諸葛亮

下

子喬

卷九

列傳四

關羽

張飛

馬超

黃忠

趙雲

陳到

卷十

列傳五

龐統

法正

徐庶

董和

胡濟

劉巴

卷十一

列傳六

許靖

麋竺

孫乾

簡雍

伊籍

秦宓

馬良

鄧芝

宗預

廖化

卷十二



列傳七

陳震

董允

陳祇

董恢

呂乂

杜祺

劉幹

楊洪

何祇

楊顒

姚伷

馬勲

馬齊

王謀

賴恭

恭子衣

何宗

習禎

殷觀

董厥

樊建

卷十三

列傳八

劉封

孟達

彭義

廖立

李平

即李嚴

劉琰

馬謖

魏延

楊儀

兄慮

卷十四

列傳九

蔣琬

劉敏

費禕

李福

卷十五

列傳十

霍峻

子弋

王連

向朗

兄子寵

張裔

吳懿

族弟班

費詩

李朝

卷十六

列傳十一

黃權

子崇

李恢

王平

句扶

呂凱

王伉

馬忠

張嶷

卷十七

列傳十二

姜維

張翼

王嗣

卷十八

列傳十三

楊戲

許慈

胡潛

孟光

來敏

尹默

李譔

陳術

郤正

卷十九

列傳十四

譙周

黃皓

卷二十

孝友

列傳十五

李宓

孟宗

陳表

張範

卷二十一

忠義

列傳十六

金祿

耿紀  
穆

韋晃

吉本

本子邈

邈弟

魏諷

傅彤

子僉

諸葛瞻

子尚

程畿

嚴顏

杜德

秦旦  
黃強

張羣

邵疇

常播

張悌

石偉

卷二十二

隱逸

列傳十七

管寧

張璠

胡昭

焦先

扈累

石德林

杜微

劉頴

卷二十三

方技

列傳十八

李意其

周羣

張裕

吳範

魏滕

趙達

劉惔

葛衡

皇象

杜夔

馬鈞

朱建平

周宣

趙直

管輅



卷二十四

吳載紀一

孫堅

孫策

孫權

卷二十五

吳載紀二

孫亮

孫休

孫皓

孫登  
謝景

孫和

孫靜

峻  
張梁

紉

瑜

皎

真

孫賁

弟輔

孫翊

弟匡

孫韶

卷二十六

吳載紀三

劉繇

士燮

太史慈

朱治

卷二十七

吳載紀四

張昭

子承休

顧雍

子邵  
孫承

邵子譚

諸葛瑾

子恪

聶友

卷二十八

吳載紀五

張紘

步騭

嚴畯

裴玄

程秉

闕澤

唐固

薛綜

是儀

胡綜

卷二十九

吳載紀六

周瑜

魯肅

呂蒙

卷三十

吳載紀七

程普

韓富

黃蓋

蔣欽

徐盛

周泰

陳武

子脩

脩弟表

董襲

凌統

甘寧

潘璋

丁奉

卷三十一

吳載紀八

朱然

施績

朱桓

子異

呂範

子據

賀齊

孫邵

卷三十二

吳載紀九

潘濬

吳岱

徐原

全綜

駱統

周魴

鍾離牧

留贊

卷三十三

吳載紀十

陸遜

子抗

弟瑁

族子凱

卷三十四

吳載紀十一

虞翻

張溫  
暨鮑

韋昭

王蕃  
樓玄

華覈

吾粲  
朱據

滕胤

卷三十五

吳載紀十二

趙咨

沈珩

鄭泉

馮熙

陳化

李衡  
谷利

卷三十六

魏載紀一

曹操

曹丕

曹叡  
叡子芳  
丕孫髦  
操孫奐

卷三十七

魏載紀二



曹彰

弟植

冲

曹仁

曹洪

曹休

曹真

子爽

夏侯惇

族弟淵

尚

淵從子玄

卷三十八

魏載紀三

荀彧

董昭

華歆

荀攸

賈詡

程昱

劉粦

蔣濟

卷三十九

魏載紀四

鍾繇

陳羣  
子泰

陳矯  
徐宣

衛臻

盧毓

杜畿  
子恕

鄭渾

卷四十

魏載紀五

王朗

子肅

王弼

王粲

徐幹  
阮瑀

陳琳  
應瑒

孔璋  
劉楨

衛覲

劉劭

傅嘏

崔林

楊俊

高堂隆

卷四十一

魏載紀六

崔琰

毛玠

鮑勛

徐邈

胡質

桓階

裴潛

梁習

司馬朗

卷四十二

魏載紀七

田疇

王脩

常林

和洽

楊阜

辛毗

卷四十三

魏載紀八

賈逵

蘇則

任峻

張既

杜襲

高柔

劉放

卷四十四

魏載紀九

張遼

樂進  
臧霸

李典

張郃

龐德

許褚  
閻溫

典韋  
龐涓

文聘

呂虔

滿寵

田豫

郭淮

王凌

母丘儉  
諸葛誕

文欽

王昶

王基

鄧艾

義例

音義四卷

臣等謹案續後漢書四十九卷宋蕭常撰常廬陵人鄉貢進士初常父壽朋病陳壽三國志帝魏黜蜀欲為更定未及成書而卒常因述父志為此書以昭烈帝為正統作帝紀二卷年表二卷列傳十八卷以吳魏為載記凡二十卷又別為音義四卷義例一卷於蜀志增傳四十二廢傳四移魏志傳入漢十吳志廢傳二十魏志廢傳八十九多援裴注以入

傳其增傳亦皆取材於注間有注所未及者  
建安以前事則據范書建安以後則不能復  
有所益蓋其大旨<sub>在</sub>書法不在事實也然其  
義例精審頗得史法如魏吳諸臣本附見二  
國載記之後而中有一節可名如孟宗陳表  
等則別入孝友傳杜德張悌等則別入忠義  
傳管寧吳范等則別入隱逸方技傳體實本  
之晉書又曹操封魏公加九錫等事陳志皆



稱天子命公而此乃書操自為云云則本之  
范蔚宗後漢書本紀其他筆削亦類多謹嚴  
惟陳志先主傳稱封涿縣陸城亭侯而常於  
昭烈紀但云封陸城侯陳志建安十四年魏  
延為都督而常則云拔魏延為鎮遠將軍裴  
注既無此語不知常何所本然常之所長不  
在考証殆偶然筆悞非別有典據也常成此  
書時嘗以表自進於朝所列但有本紀表傳

載記而無音義至周必大序始併音義言之  
或成書之後又續輯補入歟乾隆四十四年  
三月恭校上

總纂官臣紀昀臣陸錫熊臣孫士毅

總校官臣陸費墀

續後漢書原序

曹氏代漢名禪實篡特新莽之流亞丕登壇自形舜禹之言固不敢欺其心矣今向千載人之好惡豈復相沿而蘓軾記王彭之說以為塗巷談三國時事兒童聽者聞劉敗則輦輿曹敗則稱快遂謂君子小人之澤百世不斬茲豈人力強致也與陳壽身為蜀人徒以仕屢見黜父又為諸葛所髡於劉氏君臣不能無憾著三國志以魏為帝而指漢為蜀與孫氏俱謂之主設心已偏故

凡當時祿祭高帝以下昭穆制度皆畧而不書方見乞  
米於人欲作佳傳私意如此史筆可知矣其死未幾習  
鑿齒作漢晉春秋起光武終愍帝以蜀為正魏為篡謂  
漢亡僅一二年則已為晉炎興之名天實命之是蓋公  
論也然五十四卷徒見於唐藝文志本朝太平御覽之  
目逮仁宗時修崇文總目其書已逸或謂世亦有之而  
未之見也幸晉史載所著論千三百餘言大旨昭然劉  
知幾史通云備王道則曹逆而劉順近世歐陽脩議正

統不黜魏其賓客章望之著明統論辨之見於國史張  
栻經世紀年直以先主上繼獻帝為漢而附魏吳于下  
方皆是物也今廬陵貢士蕭常潛心史學謂古以班固  
史為漢書范曄史為後漢書乃起昭烈章武元年辛丑  
盡少帝炎興元年癸未為續後漢書既正其名復擇注  
文之善者併書之積勤二十年成帝紀年表各二卷列  
傳十八卷吳載記十一卷魏載記九卷別為音義四卷惜  
乎壽䟽畧於前使常不得追記英賢憲章于後以釋裴

松之之遺恨也昔周東遷寢以微弱至春秋時僅為王  
城而吳楚强大綿地數千里皆僭稱王聖人斷然以夷  
狄子之昭烈土地甲兵甚非周比興於漢中適與沛公  
始封國號同天時人事決非偶然孔子復生必有以處  
此乃為首探魏文當日之心次舉蘇氏百世之說以合  
習氏之論而證舊志之非作續後漢書序慶元六年庚  
申二月望少傅觀文殿大學士致仕益國公食邑一萬  
四千六百戶食實封五千四百戶周必大書

進續後漢書表

臣常言名義至重信古今之不渝書法匪輕雖毫釐之  
必計理不可易事固當然竊觀魯史之文仰識宣尼之  
志盟會所列敢辱天子之尊王人雖微必敘諸侯之上  
偕如吳楚爵不過子盛若威丈號止稱侯蓋天常尊地  
常卑轉移不可譬履雖新冠雖敝顛倒弗容載惟聖經  
筆削之言深疾史氏抑揚之謬彼妄肆一時之意蓋莫  
如三國之書既紀曹而傳劉復貶漢而為蜀以鬼蜮之

雄而接東京正統以高丈之胄而與孫權並稱徒知崇  
偽而黜真寧識尊王而賤伯不可以訓莫甚于斯是用  
質之古人揆之公議一切反之于正多言守之以中爰  
痛闢于淫辭庶少扶于名教恭惟皇帝陛下廣淵齊聖  
緝熙光明推太宗開卷有益之誠佩高廟放心莫收之  
戒每于經筵之暇及夫史學之傳獨全深識遠覽之明  
力主大公至正之道如臣末學為時鄙儒自幼承師法  
于先臣有志明天下之大義凡疑似是非之際必反覆



辨析其間名不假人斥垣衍帝秦之論物不失舊大少  
康祀夏之功非固徇管見臆決之私直欲還天理人心  
之正采諸儒之遺說更再世以成書小道或有可觀多  
見其不知量僅足廁兔園之列詎敢追麟筆之餘藏名  
山副在京師論次愧十年之作閱書林幸乎東觀宴閒  
裨乙夜之觀所有臣編次續後漢書紀表列傳載記總  
計四十二卷謹繕寫成八冊隨表上進以聞臣常誠惶  
誠恐頓首頓首謹言

--	--	--	--	--	--	--	--

欽定四庫全書

續後漢書卷一

宋 蕭常 撰

帝紀一

昭烈皇帝諱備字玄德景帝子中山靖王勝之後也勝子貞元朔二年封陸城侯因家於涿郡祖雄舉孝廉官至東郡范令父弘亦仕州郡昭烈生於桓帝延熹四年少孤與母販履織席自給舍東南有桑高五大童童如車蓋或謂當出貴人昭烈與諸兒戲桑下曰吾當乘此

羽葆車叔父子敬謂曰毋妄言族矣年十五母使行學  
與同宗劉德然遼西公孫瓚師事故九江太守同郡盧  
植德然父元起給其貲用與德然等元起妻有難色元  
起曰吾宗有此兒非常人也而瓚亦與友善昭烈不甚  
樂讀書喜狗馬音樂美丰儀身長七尺五寸垂手過膝  
顧自見其耳寡語言善下人喜怒不形於色好交豪俠  
年少爭附之中山大賈張世平蘇雙等貲累千金見而  
異之多遺之金以故得合其衆靈帝中平元年黃巾賊

帥張角起魏郡遣八使假善道以化天下陰相連結自稱黃天分三十六部部各萬人一時俱發天下響應州郡各舉義兵昭烈帥其屬從校尉鄒靖討黃巾有功除中山安喜尉其後有詔罷免軍功為吏者昭烈亦在遣中頃之大將軍何進遣都尉毋丘毅募兵丹陽昭烈與俱至下邳遇賊力戰有功除下密丞復去官中平末至京師會董卓之亂義兵起昭烈亦聚衆從討卓後為高唐令縣為賊所殘往奔幽州公孫瓚瓚表為別部司馬

使與青州刺史田楷拒冀州牧袁紹數有戰功試守平原立領平原相郡人劉平素與昭烈有隙耻為之下結客刺之客不忍語之而去歲大饑民苦鈔暴昭烈外禦寇難內振貧乏士之至者必與同席而坐同器而食衆多歸焉北海相孔融屯都昌為賊管亥所圍遣太史慈來告急昭烈曰孔北海知世間有劉備耶即遣精兵三千赴之賊尋解散袁紹攻公孫瓚昭烈與田楷東屯齊獻帝初平四年曹操攻徐州陶謙遣使告急於楷楷與

昭烈救之時昭烈有兵千餘及幽州烏丸雜胡騎又得  
饑民數千人既至謙以丹陽兵數千益之昭烈遂去楷  
歸謙謙表為豫州刺史屯小沛興平元年春操引兵還  
夏操復遣荀彧程昱等攻豫州昭烈為彧等所敗冬謙  
病篤謂別駕麋竺曰非劉玄德不能安此州謙卒竺帥  
州人迎昭烈昭烈固辭典農校尉下邳陳登進曰漢室  
陵遲海內傾覆立功立事正在今日此州殷富戶口百  
萬欲屈使君撫臨之昭烈曰袁公路近在壽春此君四

世五公海內所歸宜以州與之登曰公路驕豪非治亂之主今欲為使君合步騎十萬上可以輔主濟民成五伯之業下可以割地守境書功竹帛惟使君幸聽登言孔融亦謂昭烈曰袁公路豈憂國忘家者耶冢中枯骨何足介意今日之事百姓與能天與不取悔不可追昭烈遂領徐州陳登遣使以奉昭烈之意告袁紹紹曰劉玄德弘雅有信義今徐州樂戴之誠副所望也二年二月董卓餘衆李傕郭汜相攻三月李傕脅天子幸其營



四月郭汜攻李傕傕移天子幸北塢張濟自陝來和傕  
汜秋七月車駕東歸楊定董承等侍送八月至新豐冬  
十月郭汜遣兵來逼乘輿楊定楊奉與戰破之十一月  
傕汜等追乘輿戰于東澗王師敗績車駕幸曹陽楊奉  
董承引韓暹李樂等帥師奉迎與傕等戰破之十二月  
車駕乃進傕等復來追王師大敗進幸陝北渡河至安  
邑是歲孫策始據江東

建安元年五月改元夏袁術來攻昭烈使司馬張飛守

下邳自將拒術於盱眙淮陰相持累月下邳相曹豹陶謙故將也與飛相失飛殺之城中乖亂術與呂布書勸令襲下邳布即引軍東下中郎將丹陽許耽反迎之飛敗走昭烈失其孥轉軍海西遣使與布連和布亦憤術轉餉不繼乃召昭烈還其孥復以為豫州刺史與并力擊術昭烈屯小沛秋七月車駕至雒陽曹操表昭烈為鎮東將軍封宜城亭侯八月操自領司隸校尉錄尚書事操殺侍中臺崇尚書令馮碩等以衛將軍董承為輔

國將軍庚申天子遷都于許冬曹操自為司空百官總  
已以聽袁術遣其將紀靈等步騎三萬復來攻昭烈求  
救于呂布布帥步騎千餘來援靈等聞布至皆斂兵布  
要靈等與昭烈釋憾遂各解去昭烈合兵復得萬餘人  
布銜之自來攻昭烈復敗因詣曹操操厚遇之表為豫  
州牧與俱至沛收散卒給其糧益與之兵使東擊布  
二年春袁術僭號于淮南秋曹操大敗之術走渡淮韓  
暹揚奉寇掠徐揚間昭烈要擊盡斬之

三年夏呂布復與袁術通使其中郎將高順騎都尉張  
遼來攻曹操使夏侯惇來救不利九月順破沛城昭烈  
脫身去復失其孥十月曹操自引兵助昭烈圍布於下  
邳禽之昭烈復得其孥從操還許操表為左將軍是歲  
天子遣謁者裴茂帥諸將誅李傕夷三族郭汜為其將  
伍習所殺

四年夏袁術欲繇徐州北從袁紹曹操遣其將朱靈從  
昭烈要擊之程昱郭嘉聞昭烈行言於操曰劉備不可

縱操悔追之不及昭烈之未東也與帝舅車騎將軍董  
承偏將軍王服吳子蘭越騎校尉种輯等受天子衣帶  
中密詔誅操操未之知從容謂昭烈曰今天下英雄惟  
使君與操耳本初之徒不足數也昭烈謂事泄方食失  
匕箸時適雷震因謂操曰聖人云迅雷風烈必變良有  
以也一震之威乃至是耶遂與承等合謀會東出未至  
術病死昭烈遂據下邳朱靈等還昭烈乃殺操徐州刺  
史車胄留關羽守下邳身還小沛郡縣多叛操為昭烈

守有衆數萬遣孫乾與袁紹連和操使其將劉岱王忠來攻昭烈大敗之

五年春董承等事覺曹操殺承等夷其族操欲自來攻其下皆曰與公爭天下者袁紹也今棄紹而東若何操曰劉備人傑也今不擊必為後患袁紹雖有大志而見事遲必不動也遂來攻昭烈敗績操收其孥并獲關羽以歸昭烈趣青州青州袁譚昭烈故茂才也將步騎來迎因至平原譚馳使白紹紹去鄴二百里奉迎父子傾

心敬之月餘所失亡士卒稍稍來集曹操與紹相拒於  
官渡汝南黃巾劉辟等叛操應紹紹遣辟等從昭烈徇  
許下關羽來歸操使曹仁等來拒昭烈還紹軍知紹無  
成陰規去計乃說紹南連荊州收劉表昭烈遂將其兵  
至汝南汝南賊龔都帥衆降合數千人操使其將蔡揚  
來攻昭烈大破之臨陣斬揚是歲紹與操相持于官渡  
紹軍大潰孫策卒弟權襲其業

六年春昭烈頓軍汝南秋曹操來攻昭烈遣麋竺等與

劉表相聞表郊迎之待以上賓之禮益其兵使屯新野  
荊州豪傑歸之日益多表疑焉使拒夏侯惇于禁等於  
博望久之昭烈設伏偽遁惇等追之大為伏兵所破昭  
烈嘗於表坐起如廁顧見其髀裏肉生慨然流涕還席  
表怪問之昭烈曰平時身不離鞍髀裏肉消今不復騎  
髀肉遂生日月若馳老將至矣而功業不建是以悲耳  
七年夏表紹卒其子譚尚相攻

九年秋曹操破表尚自領冀州牧



十年曹操敗袁譚於青州殺之

十一年曹操廢齊北海阜陵下邳常山甘陵濟陰平原  
八王除其國

十二年曹操北攻烏丸昭烈說劉表襲許表不能用及  
操自柳城還表謂昭烈曰不用公言失此大機昭烈曰  
今天下分裂日尋干戈事會之來豈有既哉若能應之  
於後則此未足為恨也是歲始用南陽人諸葛亮

十三年夏曹操自為丞相秋八月操殺太中大夫孔融

夷其族操攻劉表會表卒其子琮代立屯襄陽昭烈屯樊九月操軍至新野琮遣人約降昭烈不虞操之卒至遂將其衆去諸葛亮徐庶等並從昭烈過襄陽亮說昭烈攻劉琮荊州可有昭烈曰吾不忍也乃駐馬呼琮琮懼不能去遂降於操琮左右及荊州人多歸昭烈比到當陽衆十餘萬輜重數千兩日行十餘里別遣關羽乘船數百艘使會江陵或謂昭烈宜速行保江陵今雖擁大衆被甲者少若操兵至何以拒之昭烈曰夫濟大事

必以人為本今人歸吾吾何忍棄去操以江陵有軍實  
恐昭烈據之乃輕軍到襄陽聞昭烈已過即以精騎五  
千來追一晝夜行三百餘里及於當陽之長阪昭烈兵  
不利乃棄其孥與諸葛亮張飛等數十騎從間道走漢  
津適與羽船會得濟沔會劉表長子江夏太守琦衆萬  
餘人未有所鄉乃與俱至夏口先是孫權遣魯肅弔劉  
表二子并令與昭烈相結肅未至而操已向荊州肅與  
昭烈遇於當陽因致權意且謂昭烈曰孫討虜聰明仁

惠敬賢禮士據有六郡兵精糧多足以立事今為君計  
莫若自結于東共濟世業昭烈喜既至夏口即遣亮隨  
肅詣權且請兵擊操權遣周瑜程普等水軍數萬會昭  
烈十二月昭烈以其衆會吳師及操戰于赤壁大敗之  
盡焚其舟艦操走昭烈復與吳師水陸俱進追至南郡  
時操軍復饑疫死者大半操之北走也留曹仁等守南  
郡昭烈屯油江口表劉琦為荊州刺史分遣諸將南徇  
四郡武陵太守金旋長沙太守韓玄桂陽太守趙範零

陵太守劉度皆舉郡降廬江營帥雷緒帥衆數萬來歸  
以諸葛亮為軍師中郎將使督零陵桂陽長沙三郡調  
其租賦以充軍實

十四年冬曹仁等敗委城北走周瑜領南郡太守屯江  
陵昭烈表孫權行車騎將軍領徐州牧會劉琦卒羣下  
推昭烈領荊州牧治公安權進其妹於昭烈

十五年昭烈會孫權於京口於是盡有荊州之地是歲  
權遣使來告欲共取蜀或以為宜聽許吳終不能越荆

以有蜀蜀地可為已有荊州主簿殷觀進曰若為吳先驅進未能克蜀退為吳所乘即事去矣今但可贊其伐蜀而以新得諸郡未可發兵為解吳必不敢越我而獨取蜀如此進退之計兩得昭烈從之權果輟計遷觀別駕從事

十六年春曹操自以其子丕為五官中郎將為丞相副益州牧劉璋聞操將遣鍾繇等向漢中攻張魯大恐別駕從事蜀郡張松說璋曰曹操兵強無敵於天下若因

張魯之資以取蜀誰能禦之璋曰吾固憂之而未知所  
出松曰劉豫州使君之肺腑而曹操之深讎也且善用  
兵若使之討魯魯必破魯破則益州強操雖來無能為  
也璋然之主簿黃權固爭不可從事廣陵王累倒懸於  
州門以諫璋皆不納使其郡校尉法正帥兵四千人迎  
昭烈敕所在供奉前後賂遺以巨億計正因陳益州可  
取之策治中從事龐統亦說昭烈曰荊州荒殘人物凋  
瘁東有孫權北有曹操難以得志今益州國富兵強戶

口百萬寶貨山積可借此以定大事昭烈曰今與吾水火者曹操也操以急吾以寬操以暴吾以仁操以譎吾以正事乃可成今以小故而失信義於天下吾所不取統曰權變從時固非一道所能盡兼弱攻昧五伯之事逆取順守報之以義事定之後封以大國何負於信今日不取終為人利耳昭烈遂行留諸葛亮關羽等守荊州自將步卒萬人入益州至涪璋自出迎張松使法正啓昭烈龐統亦進說可於會襲璋昭烈曰初入其國恩



信未孚此大事不可倉卒璋推昭烈行大司馬領司隸校尉昭烈亦推璋行鎮西大將軍領益州牧璋於是益昭烈兵使擊張魯又領督白水軍昭烈并軍三萬餘人車甲器械資貨甚盛璋還成都昭烈北至葭萌未即討魯厚施恩德以結民心是歲孫權徙治秣陵

十七年春曹操矯天子命贊拜不名入朝不趨劔履上殿如蕭何故事冬操攻孫權權遣使來告急昭烈使謂璋曰曹操攻吳吳憂危急孫氏與孤本為唇齒又樂進

在青泥與關羽相拒今不往救羽進必大克轉畧州境其憂有甚于張魯魯自守之賊不足慮也乃從璋求益萬兵及軍資欲東行璋許兵四千餘所求皆給半張松書與昭烈及法正曰今大事垂立何為釋此去乎松兄廣漢太守肅懼禍及白發其謀於是璋收斬松嫌隙始開矣璋敕關戍諸將文書勿使關通昭烈昭烈大怒召璋白水軍督楊懷高沛責以無禮斬之乃使黃忠卓膺勒兵攻璋昭烈徑至關中質諸將并士卒妻子引兵與忠

膺等進至涪據其城璋使劉瓚冷苞張任鄧賢等拒於涪瓚等皆敗退保縣竹

十八年春劉璋復使李嚴督縣竹諸軍嚴帥衆降昭烈兵益張分遣諸將平定郡縣進圍雒城諸葛亮張飛趙雲等將兵沂江定白帝江州江陽惟關羽留鎮荊州是歲曹操自為魏公加九錫又以其三女為天子貴人

十九年夏拔雒城進圍成都征西將軍馬超以其衆自漢中來歸拜平西將軍圍城數十日劉璋出降遷之于

南郡公安時蜀中殷富昭烈大饗士卒取城中貲財分  
賜將士而還其穀帛昭烈復領益州牧諸葛亮為股肱  
法正為謀主關羽張飛馬超為爪牙許靖麋竺簡雍為  
賓客如董和黃權李嚴等皆璋之所信用吳懿費觀等  
又璋之姻戚而劉巴輩亦宿昔之所忌恨皆處之顯任  
盡其器能有志之士無不競勸十一月曹操弑皇后伏  
氏滅其族并殺二皇子昭烈聞之發喪制服曰老賊不  
死禍亂未已操又自置旄頭宮殿設鍾虡是歲分廣漢

為梓潼郡

二十年春曹操自以其女為天子皇后又矯制命已承制封拜諸侯守相孫權以昭烈已得益州來求荊州昭烈曰須得涼州當以荊州相與權怒乃遣呂蒙襲奪長沙零陵桂陽三郡昭烈帥師五萬下公安關羽入益陽秋曹操取漢中張魯走巴西孫權請和分荊州之江夏長沙桂陽東屬南郡零陵武陵西屬引軍還江州冬遣黃權帥師迎張魯未至魯已降操操還令夏侯淵張郃

屯漢中郤等數犯巴境昭烈遣張飛帥師進次宕渠與  
郤等戰于瓦口大敗之郤等收餘衆走南鄭昭烈亦還  
成都

二十一年夏曹操自進號魏王秋操殺琅邪王熙除其  
國

二十二年夏曹操僭天子旌旗出警入蹕冬操冕十有  
二旒乘金根車駕六馬設五時副車又自以其子丕為  
魏太子昭烈帥諸將進兵漢中遣將軍張飛馬超吳蘭

屯下辨操使其將曹洪等來拒

二十三年春正月京兆金祿太醫令吉本少府耿紀丞相司直韋晃等憤曹操竊國起兵誅之不克夏昭烈分遣吳蘭雷銅等入武都為操軍所敗蘭死之昭烈次于陽平討夏侯淵張郃

二十四年春正月昭烈自陽平南渡沔水緣山稍前營于定軍興勢淵等帥其衆來拒昭烈使討虜將軍黃忠乘高鼓譟攻之大破其軍臨陣斬淵及操所遣益州刺史

史趙顥等張郃走三月曹操帥其衆自長安入斜谷昭烈曰操雖來無能為也我必有漢中矣及操至昭烈堅壁以老其師操軍士降者日益多乃遣將軍趙雲擊之操軍大敗墮漢水死者萬數夏五月操悉軍走昭烈遂有漢中遣孟達自秭歸北攻操之房陵殺其守蒯祺又遣劉封孟達李平等攻申耽於上庸耽舉郡降秋七月羣下上昭烈為漢中王表於天子曰平西將軍都亭侯臣馬超左將軍長史鎮軍將軍臣許靖營司馬臣龐羲



議曹從事中郎將臣射援軍師將軍臣諸葛亮盪寇將  
軍漢壽亭侯臣關羽征虜將軍新亭侯臣張飛征西將  
軍臣黃忠鎮遠將軍臣賴恭揚武將軍臣法正興業將  
軍臣李嚴等一百二十人言曰昔唐堯至聖而四凶在  
朝周成仁賢而四國作難高后稱制而諸呂竊命孝昭  
幼冲而上官逆謀皆憑世寵藉履國權窮凶極亂社稷  
幾危非大舜周公朱虛博陸則不能流放禽討安危定  
傾伏惟陛下誕資聖德統理萬邦而遭厄運不造之艱

董卓首難蕩覆京畿曹操階禍竊執天衡皇后太子並  
罹弑虐剥亂天下殘毀民物久令陛下蒙塵憂厄幽處  
虛邑人神無主遏絕王命厭昧皇極欲盜神器左將軍  
領司隸校尉豫荆益三州牧宜城亭侯備受朝爵秩念  
在輸力以徇國難覩其機兆赫然憤發與車騎將軍董  
承同謀誅操將安國家克寧舊都會承機事不密令操  
游魂得遂長惡殘泯海內臣等每懼王室大有閭樂之  
禍小有定安之變夙夜惴惴戰栗累息昔在虞書敦叙

九族周監二代封建同姓詩著其義歷載長久漢興之初割裂疆土尊王子弟是以卒折諸呂之難而成大宗之基臣等以備肺腑枝葉宗子藩翰心在國家念在弭亂自操破於漢中海內英雄望風蟻附而爵號不顯九錫未加非所以鎮衛社稷光昭萬世也奉辭在外禮命斷絕昔河西太守梁統等值漢中興限於山河位同權均不能相帥咸推竇融以為元帥卒立效績摧破隗囂今社稷之難急於隴蜀操外吞天下內殘羣僚朝廷有

蕭牆之危而禦侮未建可為寒心臣等輒依舊典封備  
漢中王拜大司馬董齊六軍糾合同盟埽滅凶逆以漢  
中巴蜀廣漢犍為為國所署置依漢初諸侯王故典夫  
權宜之制苟利社稷專之可也然後功成事立臣等退  
伏矯制之罪雖死無恨遂於沔陽設壇場陳兵衆羣臣  
陪位讀奏訖御王冠于昭烈昭烈上言天子曰臣以具  
臣之才荷上將之任董督三軍奉辭于外不能掃除寇  
難靖安王室久使陛下聖教陵遲六合之內否而未泰

惟憂反側疾如疾首曩者董卓首為亂階自是之後羣  
凶縱橫殘剥海內賴陛下聖德威靈人神同應或忠義  
奮討或上天降罰暴逆並殪惟獨曹操久未梟除侵擅  
國權恣心極亂臣昔與車騎將軍董承協謀討操機事  
不密承見陷害臣播越失據忠義不果遂使操窮凶極  
逆主后遇弑皇子被害雖糾合同盟念在奮力而懦弱  
不武歷年未効常恐殞歿孤負國恩寤寐永歎夕惕若  
厲今臣羣僚以為在昔虞書敦叙九族庶明厲翼五帝

損益此道不廢周監二代並建諸姪實賴晉鄭夾輔之  
福高祖龍興尊王子弟大啓九國卒斬諸呂以安太宗  
今操惡直醜正實繁有徒包藏禍心篡盜已顯既宗社  
微弱帝族無位斟酌古式依假權宜上臣大司馬漢中  
王臣伏自三省受國厚恩荷任一方陳力未効所獲已  
多不宜復忝高位以重罪謗羣臣見逼迫臣以義臣退  
惟寇賊不梟國難未已宗廟傾危社稷將墜誠臣憂責  
碎首之負若應權通變以寧靖聖朝雖赴水火所不得

辭敢慮常宜以防後悔輒順衆議拜受印璽以崇國威  
仰惟爵號位高寵厚俯思報効憂深責重驚怖累息如  
臨于谷盡力輸誠獎厲六師率齊羣義應天順時撲討  
凶逆以寧社稷以報萬分謹拜章因驛上還所假左將  
軍宜城亭侯印綬於是還治成都以許靖為太傅法正  
為尚書令關羽為前將軍張飛為右將軍馬超為左將  
軍黃忠為後將軍拔魏延為鎮遠將軍領漢中太守鎮  
漢川九月曹操相國西曹掾濟陰魏諷等憤操將篡漢

欲舉兵誅之事泄為操所害是歲前將軍關羽帥師攻曹仁於樊操遣于禁等七軍救之羽大破禁軍盡虜禁等步騎三萬送江陵又斬其將龐德等梁郊陸渾羣豪皆輸欵於羽時羽威震華夏自許以南郡縣皆應羽操懼議徙都以避之會孫權襲殺羽取荊州

二十五年春正月曹操死子丕自為丞相魏王冬十月曹丕篡帝位於繁陽國號魏改元黃初廢天子為山陽公或傳天子遇害王乃發喪制服時所在言祥瑞者相



屬將軍孟達叛奔于魏殺副軍將軍劉封十二月曹丕遷于雒陽是歲後將軍黃忠尚書令法正卒

章武元年春故議郎陽泉侯劉豹青衣侯向舉偏將軍張裔黃權大司馬屬殷純益州別駕從事趙苴治中從事楊洪從事祭酒何宗議曹從事杜瓊勸學從事張爽尹默譙周等上言臣謹按雒書甄曜度曰赤三日德昌九世會備合為帝際雒書寶號命曰天度帝道備稱皇以統握契百成不敗雒書錄運期曰九侯七傑爭命民

炊骸道路藉藉履人頭誰使主者玄且來臣父羣未亡  
時言西南數有黃氣直立數丈見來積年時時有景雲  
祥風從璿璣下來應之此為異瑞又二十二年中數有  
氣如旗從西竟東中天而行圖書曰必有天子出其方  
是年太白熒惑鎮星常從歲星相追先漢初興五星從  
歲星謀歲星主義漢位在西義之上方故漢法常以歲  
星候人主當有聖主起於北州以致中興時許帝尚存  
故羣下不敢漏言頃者熒惑復追歲星見在胃昴畢昴

畢為天網經曰帝星處之衆邪消亡聖諱豫覩推察期  
驗符合數至若此非一臣聞聖王先天而天不違後天  
而奉天時故應際而生與神合契願大王應天順人速  
即洪業以寧海內太傅許靖安漢將軍麋竺軍師將軍  
諸葛亮大常賴恭光祿勳黃權少府王謀等上言曹丕  
篡弒湮滅漢室竊據神器劫迫忠良酷烈無道人鬼忿  
毒咸思劉氏今上無天子海內皇皇靡所式仰羣下前  
後上書者八百餘人咸稱述符瑞圖讖明驗黃龍見武

陽赤水九日乃去孝經援神契曰德至淵泉則黃龍見  
龍者君之象也易乾九五飛龍在天大王當龍升登帝  
位也又前關羽圍樊襄陽襄陽男子張嘉王休獻玉璽  
璽潛漢水伏於淵泉暉景燭耀靈光徹天夫漢者高祖  
本所起定天下之國號也大王襲先帝軌跡亦興於漢  
中今天子玉璽神光先見璽出襄陽漢水之末明大王  
承其下流授大王以天子之位瑞命符應非人力所致  
昔周有烏魚之瑞咸曰休哉二祖受命圖書先著以為

徵驗今上天告祥羣儒英俊考述河雒讖記咸至于廷  
伏惟大王出自孝景皇帝中山靖王之胄本支百世乾  
祇降祚聖姿碩茂神武在躬仁覆德積愛人好士是以  
四方歸心焉考省靈圖啓發讖緯神明之表名諱昭著  
宜即帝位以纂二祖紹嗣昭穆天下幸甚臣等謹與博  
士許慈議郎孟光定禮儀擇令辰上尊號夏四月丙午  
即皇帝位于成都燔柴告天其祝文曰維建安二十六  
年四月丙午皇帝臣備敢用玄牡昭告皇天上帝后土

神祇漢有天下歷數無疆曩者王莽篡盜光武皇帝震怒致誅社稷復存今曹操阻兵安忍虐弑主后滔天泯夏罔顧天顯操子丕載其凶逆竊居神器羣臣將士以爲社稷隳廢備宜脩之嗣武二祖恭行天罰備惟否德懼忝帝位詢于庶民外及蠻夷君長僉曰天命不可以不荅祖業不可以久替四海不可以無主率土式望在備一人備畏天明命又懼漢邦將湮于地謹擇元日與百僚登壇受皇帝璽綬脩燔瘞告類于天神惟神嚮祚

于漢家永綏四海于是建元為章武大赦天下以軍師  
諸葛亮為丞相太傅許靖為司徒置百官立宗廟祫祭  
高皇帝以下五月立妃吳氏為皇后立子禪為皇太子  
六月立子永為魯王理為梁王車騎張飛為其下所殺  
初帝憤孫權之襲關羽秋七月車駕東征孫權遣使納  
款帝怒不許權乃使其將陸議李異等屯巫秭歸以拒  
王師將軍吳班馮習自巫攻破異等軍次秭歸四萬餘  
人武陵五谿蠻夷遣使請助討權是歲曹丕封權為吳

王權遷于武昌

二年春正月將軍吳班陳式水軍屯夷陵夾江東西岸  
二月行自秭歸敕諸將進軍緣山截嶺營于夷道猓亭  
自佷山通武陵遣侍中馬良宣慰五谿蠻夷咸相帥響  
應鎮北將軍黃權督江北諸軍拒吳軍且備魏寇夏六  
月黃氣見自秭歸十餘里中廣數十丈王師敗績于猓  
亭將軍馮習張南等死之鎮北將軍黃權以道梗没于  
魏行自猓亭至秭歸收合離散陸行還魚復改魚復縣



曰永安八月司徒許靖薨冬十月詔丞相亮營南北郊  
於成都孫權聞車駕猶駐白帝大懼十二月復遣其太  
中大夫鄭泉來納款許之遣太中大夫宗瑋如吳帝不  
豫漢嘉太守黃元聞之舉兵反是歲驃騎將軍馬超薨  
尚書令劉巴卒

三年春二月丞相亮自成都至永安三月黃元犯臨邛  
縣遣將軍陳曷討之元伏誅帝疾革丞相亮尚書令李  
嚴並受遺詔輔皇太子夏四月癸巳帝崩于永安宮時

年六十三遺詔百官發哀滿三日除服到葬期服如禮其郡國守相都尉令長三日便除五月梓宮至自永安秋八月葬惠陵謚曰昭烈皇帝帝寬仁大度知人善任使有高帝之風臣下雖有顯過必曲意原貸待關羽張飛如親父子一見諸葛亮違衆用之遂成帝業又性儉約嘗毀帳鉤銅以鑄錢非軍功不妄賜予以故國用不至匱乏初入益州丞相掾趙戩問於徵士傅幹曰劉玄德其濟乎幹曰玄德寬仁有度能得人死力諸葛亮達

治知變正而有謀而為之相關羽張飛勇而有義皆萬人敵而為之將此三人者皆人傑也以玄德之畧三傑佐之何為不濟時馬謖有盛名亮每器之帝謂亮曰馬謖言過其實不可大用亮不以為然後竟有街亭之敗贊曰漢承秦慘刻之後高大以寬仁結人心淪浹既久牢不可解雖中更禍變而人之謳吟思漢不絕于口世祖因之卒復舊物重以章帝惠及胎養培植益固靈獻之際可謂大壞極亂矣而一時英雄擁兵負固者猶以

劉氏藉口昭烈父子以帝室支屬介在一隅而正位號  
尚數十年由先漢至是垂祀五百三代以還蓋未之有  
人主之結人心其效廼爾有大物者庸可忽諸

續後漢書卷一